

# Mnyika ataka mabadiliko ya tabia nchi yawe janga la taifa

**Na Otilia Paulinus,  
Dar es Salaam**

MBUNGE wa Ubungo, John Mnyika (CHADEMA), amesema kuna haja suala la mabadiliko ya Tabia Nchi likapelekwa bungeni na kutangazwa kama janga la kitaifa.

Mnyika alitoa kauli hiyo jana Dar es Salaam alipokuwa akizungumza katika kongamano la mazingira lililokuwa likijadili njia mbadala za kupunguza madhara yatokanayo na mabadiliko ya

tabia nchi.

“Serikali isichanganye majanga ya mabadiliko ya tabia nchi na ukosefu wa mbinu za kutengeneza miundombinu katika miji yetu kwani barabara za jijini Dar es Salaam zinajaa maji wakati wa mvua.

“Hali hii inatokana na mfumo mbovu wa miundombinu na kisera tu na hili linaweza kutatuliwa na Serikali iliyoko madarakani kama ikitaka kufanya hivyo.

“Kwa hiyo, nawashauri Watanzania na Waafrika kwa ujumla, wawe na sauti

katika mikutano ya kimataifa ya kuyadai fidia mataifa makubwa juu ya athari zinazosababishwa na mataifa hayo katika kuharibu tabaka la ozoni na hewa ya ukaa.

“Lazima tuwe na sauti moja kwa sababu enzi za akina Mwalimu Nyerere, Afrika ilikuwa na sauti moja ya kudai haki hasa wakati ule ilipokuwa ikidai kufutiwa madeni, lakini sasa Afrika haina sauti tena imepotea kwani hata katika mkutano wa Afrika Kusini, hawakuwa na sauti yoyote ni kama walienda kusanya posho tu,” alisema Mnyika.